

# Акафист преподобному Петру, царевичу Ростовскому, чудотворцу

## Кондак 1

Избранный Богом от агарянского рода царска и вчиненный в недра православныя Христовы Церкви, наученный святыми Апостолами Петром и Павлом к созиданию во имя их святых обители, прими от нас недостойных хвалебную песнь, тебе приносимую: Радуйся, преподобне царевиче Петре, Ростовский чудотворче.

## Икос 1

Ангела ты земного видяще, о небесный гражданин, преподобне царевиче Петре, возревновахом мы недостойнии похвальная воспети тебе сице: Радуйся, терпением угодивый Господу; Радуйся, яко Господь внят ти, и услыша молитву преподобнаго Своего. Радуйся, яко удалился еси, бегая от дому и племени твоего; Радуйся, яко жительствуя среди языка безбожнаго, желание возымел ко Христу обратися. Радуйся, яко бдел еси в молитве сердечней к Богу; Радуйся, яко плоть твоя изменися трудов и пощения ради, но дух твой возвысися в воздержании. Радуйся, яко исповедятя Господеву о обращении твоём преподобнии Его; Радуйся, яко с ними воспеваеши на небесех славу Божию. Радуйся, преподобне царевиче Петре, Ростовский чудотворче.

## Кондак 2

Видя святой Петр себе непоробощенна плотскому сладострастию, радовашеся духом, желая прилепитися Христу всем сердцем и воспева-ти Богу: Аллилуиа.

## Икос 2

Разум, недоразумеваемый о Трипостасном Божестве и о безсеменном воплощении Бога Слова, разумети не искаша ослеплении прелестию идолослужения древние ханы Ордынстии; ты же, святой Петре, по благодати Божией, озарившей тя, и в неверии еще ты сущу светильника Ростовския паствы епископа Кирилла в научение ты христианстей вере взыскал еси. Сего ради ублажаем тя сице: Радуйся, подобне Корнилию сотнику, и в язычестве добродетельми сиявый; Радуйся, подобне ему, вместо Апостола Петра приемника апостольскаго епископа Кирилла взыскавый. Радуйся, яко на тебе сбытсся апостольское слово: «Во всяком языке бояйся Бога и делаяй правду приятен Ему есть»; Радуйся, яко всевидящее око Божие, узрев твое усердие, благодатию Святаго Духа озари тя. Радуйся, яко неизреченный Божий Промысл потребы ради Церкви, тебе же во

спасение, епископа Кирилла во Орду приведе; Радуйся, яко Ростовский иерарх царя Беркая, дядю твоего, беседою о чудесах, в Церкви Христовой являемых, услади. Радуйся, яко ты, млад быв юноша, глаголами святителя Кирилла сердце свое умилил еси; Радуйся, яко размышлением о христианстей вере ум твой просветися. Радуйся, преподобне царевиче Петре, Ростовский чудотворче.

### **Кондак 3**

Сила Вышняго осени тя, царевиче Петре, отвергши бесовское служение твари, прилепитися Христовой вере православней. Темже яко ревнитель святяга веры показался еси крепок всем, тя воспевающим и радостно поющим Богу: Аллилуиа.

### **Икос 3**

Имущи богоприятную мысль, святый Петре, познати истины христианския веры, при вторичном пришествии во Орду Ростовскаго святителя Кирилла, ради исцеления царева сына, и видев чудесное сего оздравление, благодатию Христовою и молитвами архиереа Божия совершившееся, ты крепчае прилепился еси ко Христу и возжелал еси быти христианин. Темже радостно зываем ти таковая: Радуйся, яко подобник был еси соименному ти верховному Апостолу Петру; Радуйся, подобно ему, оставившему мрежи и отца своего, и ты дом царский и сродство свое оставил еси. Радуйся, яко славу наследия земнаго царства во Орде ты презрел еси; Радуйся, яко вся красная мира сего уметы Христа ради вменил еси. Радуйся, яко во след Христа Бога радостно потекл еси; Радуйся, яко теплою душею крещения святаго ты взыскал еси. Радуйся, яко тем осияние Христово в сердце твоём приял еси; Радуйся, яко благое иго Христово прияти восхотел еси. Радуйся, преподобне царевиче Петре, Ростовский чудотворче.

### **Кондак 4**

Буря страстей юностнаго телесе и мирских прелестей и славы земныя не поколеба храма души твоя, преподобне Петре, основан бо бе на камени краеугольном исповедания Христа, Ему же яко Богу и Спасителю нашему воспеваем: Аллилуиа.

### **Икос 4**

Слыша князь и вси людие богоспасаемаго града Ростова, яко первосвятитель их Кирилл грядет из посольства с дарами и честию от царя, имея при себе приобретенное его наставлениями духовное сокровище, тебе, блаженно Петре, хотящаго прияти православную веру во граде Ростове, возрадовашася радостию духовною. Темже и мы, аще и недостойнии, дерзаем в радости сердец зывати тебе сице:

Радуйся, от любви душевныя к Богу отечество твое оставивый; Радуйся, единого Христа возлюбивый. Радуйся, с любовью сердечною наставление епископа Кирилла о вере христианской послушавый; Радуйся, отшествия епископа Кирилла из Орды в Россию усердно назиравый. Радуйся, в благочестивом, твоём намерении препятствия сродников не убоявыйся; Радуйся, тайно из дому твоего удаливыйся. Радуйся, епископа на пути достигнувый и пояти ты с собою его умоливый; Радуйся, яко незлобивое овца Христова стада со пастырем Церкви во ограду христоименитых людей вшедый. Радуйся, преподобне царевиче Петре, Ростовский чудотворче.

### **Кондак 5**

Боготечней звезде ты, преподобне царевиче Петре, подобен был еси, егда из нечестивыя Орды к богоспасаемому граду Ростову путь шествия творил еси. Святитель же Божий Кирилл, радуяся душою о твоём благом произволении, с трепетом воспеваше Богу: Аллилуиа.

### **Икос 5**

Видеша людие Ростовстии, яко возсия в сердце твоём свет Христа Бога и из неверия обрати ты в правоверие, возрадовашася сердца своими. Сего ради и мы, дивящися неизреченному смотрению Божию, вопием ти: Радуйся, по пришествии в Ростов благолепие храмов Божиих с любовью и благоговением созерцавый; Радуйся, и не быв еще просвещен святым крещением, в Церкви Божией пребывавый. Радуйся, по смерти царя Беркая во Орде возвратитися туда не восхотевый; Радуйся, и взысканию о тебе бывшу, под кровом святителя Ростовскаго себе укрывый. Радуйся, крещения святого со усердием и верою испросивый и оною рукою епископа приемый; Радуйся, во имя Апостола Петром нареченный. Радуйся, письмени языка словенскаго и церковному чтению и пению прилежно научивыйся; Радуйся, для утверждения в вере христианстей в доме архиерейстем вселивыйся. Радуйся, преподобне царевиче Петре, Ростовский чудотворче.

### **Кондак 6**

Проповедует созданная тобою во имя святых верховных Апостол Петра и Павла святая обитель, яко ты, блаженне Петре, был еси всем благоприветлив и любезен, и якоже древний Иов, око слепым и нога хромым. Сего ради воспеваем Богу: Аллилуиа.

### **Икос 6**

Возсиявый во Египте просвещение истины и отгнавый лжи тьму, Христос Бог наш благоволи возсияти и во языческой Ордынской

стране молитвами и крепкою верою святителя Кирилла, исцелившего царева сына от болезни, и тебе, святой Петре царевиче, светом познания веры христианския озарившаго. Того ради сице вопием ти: Радуйся, от языческаго племени в веру Христову призванный; Радуйся, от тины идолослужения банею пакибытия обновленный. Радуйся, от корене злоращенного благовонный цвет произрастший; Радуйся, злостраданаго зловония страстей избегший. Радуйся, яко пчела люботрудная, сладкий сот добродетелей сотворивший; Радуйся, бдению и воздержанию себе с терпением изрядне научивый. Радуйся, молитвы сердечныя к Богу возсылавый; Радуйся, всякими добродетельми себе украсивый. Радуйся, преподобне царевиче Петре, Ростовский чудотворче.

### **Кондак 7**

Егда приближися время епископу Кириллу отъити ко Господу, он, яко наставник твой, царевиче Петре, в вере христианской не остави тя сира, но утверди на пребывании в доме архиерейстем до пришествия преемника своего. Святой же епископ Игнатий, по вступлении на престол церкви града Ростова, зря тя преспевающа в возрасте духовном, зело возлюбил тя и, радуяся духом, воспеваше Богу: Аллилуиа.

### **Икос 7**

Новое чудо и дивное, премудростию судеб Божиих, исполнися на тебе, блаженне царевиче Петре, егда помышляюще ти создати церковь и при ней монастырь устроити, довольнаго же на дело сие не имущу стяжания и о сем болезнующу сердцем, случися ти уснути на бреге озера Неро и видети во сне верховных Апостол Петра и Павла, грядущих и два мешца злата и серебра на созидание обители во имя их вдающих; возбнув же от сна во ужасе и яве оныя узрев, и в руцех твоих злато и серебро ощутив, возрадовался еси с трепетом. Того ради и мы воспевати тебе научихомся, глаголюще: Радуйся, попечение о создании церкви от любве к Богу возымевый; Радуйся, об устроении обители неусыпно пекийся. Радуйся, свое иноческое житие пророчески предзнаменовавый; Радуйся, на создание оных довольно не имев сокровища, желания своего не оставивый. Радуйся, несомненную на него надежду имевый; Радуйся, в соннем видении и яве верховных Апостол Петра и Павла узревый. Радуйся, дарование их тебе злата и серебра в руке приемый; Радуйся, заповедь их о приобретении триех икон на торжищи исполнивый. Радуйся, преподобне царевиче Петре, Ростовский чудотворче.

### **Кондак 8**

Странное чудо является и дивное, яко в туюжде ношь, егда тебе, святой Петре, явишася верховнии Апостоли, и святителю Игнатию они же повелеваху, да храм во имя их устроит, епископ же тому видению ужасеся, и пригласив князя, поведа бывшее, и вкупе оба совет о сем сотвориша, и воспеваху Богу: Аллилуиа.

### **Икос 8**

Весь быв, блаженне царевиче Петре, погружен в размышление о Бозе по видении Апостол и о созидании обители, при молитвенных же и постных трудех смирению и послушанию и терпению научился еси. Сего ради вопием ти: Радуйся, к созиданию обители ревность велию имевый; Радуйся, на совет о тебе князя со епископом пришедый. Радуйся, намерение их о сочетании тя браком без ропота приемый; Радуйся, тем послушание ко князю и епископу показавый. Радуйся, «Воля Господня и ваша да будет», — отвечающий; Радуйся, самим епископом святым Игнатием браковенчаный. Радуйся, апостольская словеса «Брак честен и ложе нескверно» верно сохранивший; Радуйся, и в супружеской жизни в делании добродетелей искусна себе явивый. Радуйся, преподобне царевиче Петре, Ростовский чудотворче.

### **Кондак 9**

Всяк возраст и весь народ града Ростова, вкупе с князем и святым епископом Игнатием, удивившеся приобретенным тобою, блаженне Петре, святым иконам, дивный свет испущающим, внесше их во храм соборный, со усердием воспеваху Богу: Аллилуиа.

### **Икос 9**

Вития суемудренныя еллинскаго нечестия исполненна, последи же Магометовым зловерием исполненни, не могуще истинных догмат православныя веры познати, умолкоша. Мы же, слышаще предивное твое из язычества в христианскую веру обращение, похвальная, блаженне Петре, приносим ти, вопиюще: Радуйся, по видении: Апостолов сладость духовную в сердце твоём ощутивый; Радуйся, помышления твоя в тайны смотрения Божия углубивый. Радуйся, яко о пременении себе из язычества в христианина веселившийся; Радуйся, из врученных тебе от верховных Апостол, девятию сребренниками и единою златицею, чудныя три иконы приобретый. Радуйся, яко в радости духа к епископу с теми иконами поспешивый; Радуйся, и князя, ко епископу пришедша, совет благий о устроении храма радостно слышавый, Радуйся, яко от икон, тобою принесенных, палата архиерейская дивным светом озарися; Радуйся, яко чудеса в Церкви

христианстей тобою и до днесь совершаются. Радуйся, преподобне царевиче Петре, Ростовский чудотворче.

### **Кондак 10**

Спасти хотя душу свою, преподобне царевиче Петре, всякими добрыми нравы себе украшал еси, по словеси Апостола Павла: елика истинна, елика честна, елика прелюбезна, елика доброхвальна; сия помышляя, научился в умилении духовном воспевати Богу: Аллилуиа.

### **Икос 10**

Стена был еси ограждения, блаженне царевиче Петре, всем к тебе усердно притекающим. Темже и мы, аще и недостойнии, прибегающе и с любовью тя хваляще, вопием: Радуйся, благословение архипастыря на устроение храма и обители приявый; Радуйся, у князя Ростовскаго землю на созидание обители испросивый. Радуйся, князя искушающа тя, да серебром и златом, Апостолами вданном, место искупиши, незлобиво послушавый; Радуйся, назначение цены за уреченное место по девяти сребренник и единой златице послушливо исполнивый. Радуйся, пророчество святителя Игнатия о неоскудении серебра и злата из мешцев разумевый; Радуйся, в видении верховных Апостол назначенное для обители место узревый. Радуйся, серебро и злато, яко дарование от Апостол, с верою приемый; Радуйся, яко останки того серебра и злата на удивление и благоговение до позднейших времен оставивый. Радуйся, преподобне царевиче Петре, Ростовский чудотворче.

### **Кондак 11**

Пение церковное во святей новосозданней тобою обители во имя святых верховных Апостол совершашеся, ты же, блаженне царевиче Петре, яко строитель храма и обители святых, радовался еси душою, поя Богу: Аллилуиа.

### **Икос 11**

Яко светозарную звезду во обители и светоносную свещу на свещнице Церкви Христовой, зрим тя, преподобне царевиче Петре, и во умилении душ и сердец наших поюще, взываем ти сице: Радуйся, по скончании супружницы твоя отвергийся мира; Радуйся, в созданной тобою обители монашеское житие восприявый. Радуйся, образ добродетельнаго жития всей братии бывый; Радуйся, смирение глубочайшее стяжавый. Радуйся, пощению внимавый; Радуйся, молитвы твоя к Богу, яко благовонный фимиам, возносивый. Радуйся, по трудех многих во обители твоей ко Господу в невечерний свет отшедый; Радуйся, яко Преплагий Господь за премногия твоя

добродетели святых твоя мощи нетлением прослави. Радуйся, преподобне царевиче Петре, Ростовский чудотворче.

### **Кондак 12**

Велия благодати сподобился еси от Бога, преподобне царевиче Петре, яко из языческа прелести в веру христианскую ты Бог обрати, и из тьмы поклонения твари в познание Евангельския благодати призва; последи же из мирскаго мятежа исхитив, ангелоподобному житию в тишине святых обители сподоби, по кончине же мощи твоя святых нетлением прослави. Темже толико ты прославившему Богу со страхом и радостью вопием: Аллилуиа.

### **Икос 12**

Поюще память верховных Апостол Петра и Павла и совершающе празднество дванадесяти Апостолов, воспоминаем твоя подвиги с любовью, угодниче Божий, преподобне царевиче Петре, и всечестную память, и взываем сицевая: Радуйся, Петру, камению веры, последовавший; Радуйся, Павлу, сосуду избранному, и всем святым Апостолом во благочестии ревновавый. Радуйся, древних преподобных отцев подражателю; Радуйся, ангельских чинов сопричастниче. Радуйся, лика преподобных красото; Радуйся, немощных целителю и злобных бесов прогонителю. Радуйся, телес и болезней наших врачу; Радуйся, о душах наших теплый к Богу молитвенниче. Радуйся, преподобне царевиче Петре, Ростовский чудотворче.

### **Кондак 13**

О препетый и прехвальный чудотворче отче наш преподобне царевиче Петре, видимо в созданной тобою святей обители мощами твоими пребывая, невидимо же от небесных чертог нас, грешных чад своих, назираяй! Приими сие малое приношение, от любви душевныя тебе возсылаемое, и от всякия избави напасти всех; дерзновенным же твоим ко Христу Богу ходатайством будущия нас изми муки, да с тобою в безконечныя веки воспеваем Богу: Аллилуиа.

**(Этот кондак читается трижды, затем икос 1 и кондак 1)**